

T3188/083

99

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
DEC 17 1940

湖南通志卷之一百四十

仙釋上 方伎附

解紛塞兌治國安民開沕穆而覺皇風神仙之說且欲駕三五而上此刪書所以斷自唐虞也然二氏之崇篤於秦漢而承其委者遂以九疑桃源並證詮悟又豈待援之闕之而始知其幻哉若夫彌明好道在菴披緇雖仙釋殊歸有托則一後之覽者亦可考跡而原其心也夫

長沙府

漢

袁起府志湘鄉人居晨起忽如醉三日始醒起時

哈佛大學漢和圖書館珍藏印

酒氣聞數十步自云與羣仙共飲遂絕粒數十年仙去

智益府志長沙人姓吳本征蠻卒以漁獵爲業得白龜食之遍身生瘡鬚眉手足指皆復生遂削髮爲僧法行精進於伏波將軍宅建精舍住持

青蓮僧勸善書僧嘗誦法華經感二青衣童子侍奉建興二年葬長沙縣西百里有青蓮花兩本生冢上掘視之蓮根生齒間

六朝

宋

潘子良府志劉宋時人梁天監中煉丹於梓梁巖後仙去按子良名逸遠或落遠字以爲潘逸生南宋時或失其姓以爲宋子良皆傳寫之誤至梓梁巖卽子良巖也

鄧郁之府志字彥達周遊靈山元徽中詔賜藥物於嶽麓山置上中下三觀爲修煉所有神人語曰洞門之中是招福之鄉延生之地善記弗忘丹成復回紫蓋峯梁天監十一年冬有八真人乘雲車羽蓋揖郁之就自然石壇昇去

汪真人府志煉藥安化之神山有詩云帶月人尋紅芍藥和雲仙煮紫荷車

靈應府志 住白鹿山有文二首入藏經

齊

張岳一統志清河人明帝時歷官至司空後棄官入攸縣溫泉山結廬修道白日乘雲鶴去因名其山曰司空山

梁

饒道亨虞集青霞觀碑梁大同中嘗為吏性正直不阿厭吏事白免去修行於舍夢神人自稱老君告曰吾有符章盛於玉函在子宅中得之當詣雲陽山紫微真人學之則道可成矣旦起掘地數尺果如夢即馳詣雲峯見有寶冠金衣者先生語之曰吾待子久矣遂禮之授以斗極天心之法歸行五七年救人危難不可以數計一日聞室中樂音雲氣若擁車駟而至者遂乘之仙去

唐

緱仙姑一統志長沙人修道於衡嶽有青鳥飛來為伴每有人遊山青鳥必預說姓氏及期一一皆驗後入九疑山仙去

懷素一統志長沙錢氏子疎放不拘喜飲酒善草書酒酣興發遇寺墻里壁靡不書之貧無紙乃種芭蕉萬株以供揮灑自云得草書三昧棄筆堆積埋山下曰筆冢

隱山和尚一統志洞山與密師行脚見溪流菜葉乃披草行五七里見師羸形異貌因相與問答師作偈曰一池荷葉衣無盡滿地松花食有餘剛被世人知住處又移茅屋入深居遂燒庵不知所之人稱爲隱山和尚

善覺一統志華林寺主嘗念觀世音菩薩號有二虎爲侍者呼以大空小空虎卽應聲而至

張元同府志天臺道士行甚精潔住茶陵雲陽山七年嘗擊瀑布泉石人叩之石人應聲云我秦時玉工因小過得罪逃此歲久化爲石又於正陽峯採紫莖蒲餉山下人陳士華延若干年顯慶三年上昇

黃上清府志湘鄉人父子四人修煉於石巖丹成景龍二年春有紫雲五片起巖前父子乘之飛昇民爲立廟疫癘水旱禱之輒應

桓氏二女府志唐景雲二年隱湘鄉韶山有鳳啣書來降嘗採藥東臺嶽麓僧見之二女遺以紫檀香樹俄而峯頂白雲繚繞鸞鶴飛翔冉冉昇去遺像畱仙林觀中

檇樹一統志不知何許人唐廣德間寄衣鉢檇樹中趺坐越七日喝開檇樹取衣鉢入大川山構慈雲寺以居

慧朗一統志參馬祖有悟居招提寺時稱大朗又有

振朗參石頭有悟居興國寺時稱小朗皆長沙人
景岑〔一統志〕長沙人嘗言我若一向舉揚宗教法堂
前須草深一丈事不獲已向汝諸人道。

本朝雍正十二年封洞妙朗淨禪師遣有司致祭

洪誣〔一統志〕長沙人嘗與數耆宿至襄沔間一僧舉
論宗乘頗敏捷論說不已洪誣語曰參須實參悟須
實悟閻羅大王不怕多語僧拱而退

如海〔一統志〕周氏子曾爲成都主簿後爲僧晚居長
沙在定十四日人卽其處而成室宇遂爲寶應寺去
至湘西人又從之負木礮石爲龍安寺柳宗元爲之
碑

宗智〔府志〕豫章張氏子參藥山密契心印開法於瀏
陽之道吾初入山趺坐一石有老人作禮曰吾山中
娑伽龍也待師久矣唐太和九年九月示寂告衆曰
吾當西邁理無東遷言訖而逝茶毘獲舍利若干建
塔本山後火雷電遷於石霜山

疏言〔一統志〕道林寺僧武宗會昌時沙汰浮屠盡焚
其書宣宗立詔徐復之而書籍已盡疏言至太原求
遺經得五千四十八卷輦自河東而歸李節爲之序
靈祐〔一統志〕福州趙氏子遊江西參百丈遂居參學
之首後住瀉山七載裴休爲建寺居之奏請賜額曰
密印爲五宗第一大中年盥漱趺坐怡然而逝諡大

圓禪師

本朝雍正十一年封靈覺大圓禪師遣有司致祭

慶諸一統志新淦陳氏子任潭州石霜山後參道吾
有省避世混俗於長沙瀏陽人莫能識洞山曰瀏陽
乃有古佛居石霜二十年常坐不臥僖宗聞其名專
使賜紫堅辭不受光啟四年坐化

沈鱗列仙傳字廷瑞彬之子也學道於玉笥山常衣
單褐風雪不易嗜酒工詩時呼為沈道者

彭幼謙湖廣通志湘陰人寒暑惟羽褐葺陶淡丹爐
得大藥一粒餌之年一百四十餘歲

證空指月錄潭州龍牙證空禪師嘗曰學道如鑽火
逢烟未可休直待金星現歸家始到頭又曰道者須
自悟去始得

太乙真君湖廣通志寓居太乙寺為藥池煉丹時疫
瀉大行家書一符與以藥隨愈後莫知所之遺有藥
池龍井尚存

如會府志曲江人初謁徑山後參大寂嗣馬祖法居
潭之東寺學徒日衆時號東寺為禪窟長慶癸卯示
寂加號傳明禪師

杉仙府志姓陳名皎廣東潮陽世家子初為泚農守
後棄官修道入攸縣靈谷山有神異鄉民旱澇乞仙
禱之輒應廣明間跨白鶴飛昇今明月山有廟靈應

如故

法華禪師府志初住嶽麓清風峽建石塔後飛錫湘春門外接衆說法值異人願捨鐵造佛訪之乃衡山王神也師擲錫卓地得鐵數百鈞遂冶鐵鑄佛三塔一名鐵佛寺隨還嶽麓示寂

齊已黃山谷集齊已胡氏子益陽人居龍興寺作渚宮莫問十五篇以自見初捨俗入大瀉山參禪猛利持律清苦晚歲牽情於詩遂作荊州僧正以終老
尚顏楚風補長沙僧按紀事上人與陸龜蒙方干陳陶倡和亦唐末名僧也齊已有寄尚顏上人創居詩云麓山南面橋洲西

釋夷齊楚風補少從長沙雲蓋智禪師出家執事首座一日秉拂罷齊問曰某聞首座所說莫曉其義伏望指示座諄諄誘之使究無著說這箇法踰二日遂有省座駭然後遍叅至石門印契示寂云昨夜三更過急灘灘頭雲霧黑漫漫一條拄杖爲知己擊碎千山與萬山

薩真人府志名守堅過湘陰寓城隍廟感夢里人曰此道人寓廟中吾甚不安當逐去里人因逐之真人出香少許云吾去後當焚於神座前里人諾之焚香未久雷發爐中火起焚廟後渡水值舟子不在真人自刺舟過出錢置舟中水底忽湧出一神手執金笻

向真人作禮云吾湘陰城隍王某也以真人焚吾廟
吾訴上帝命執斧相隨三年察有小過卽以斧誅之
真人云今未滿三年何以現形神曰真人渡水無人
尙與船錢大事無欺更可知矣今願皈依隨行護法
真人許之

五代

唐

慧勇府志姓譚茶陵人幼出家得契正覺一日自方
丈歸母見其羸以鷄黍食之既食於前溪剖腹出腸
淨之人呼其溪曰淨溪母喪誦華嚴經薦之有金甲
神現勇曰寺前灘聲聒耳如何神曰甚易回頭喝之

灘下五里

周草衣一統志不知何許人居湘潭大羅山草衣巖
上屣不履地口不嘗味三十餘年坐一繩床而已宋
張天覺刻詩崖石云古人一悟便心安計較何須有
百般了得草衣崖下事任他摩納與金襴
證空居遼府志撫州人初叅翠微至洞山有省一日
問如何是祖師西來意山曰待洞山逆流卽向汝道
師悟厥旨馬氏據湖南請住龍牙後示寂有星隕方
丈前塔在本山

香巖禪師府志名沙闕同得法於靈佑佑曰二子見
解過於鶯子嘗隱瀉之巖泉間遂稱巖曰香巖

宋

真如一統志大瀉山僧臨川聞氏子戒律精嚴放參後輒自作務

跛仙府志太平興國中居嶽麓自號瀟湘子嘗言我愛瀟湘境紅塵隔岸除南山七十二惟喜洞真墟元祐間有白鶴棲鳴杉松上三日而去

閉清府志河州人姓趙淳化中知潭州張茂宗延之居雲蓋示衆偈曰雲蓋鎖口訣擬議皆腦裂拍手起虛空雲霧西山月嘗坐白雲關說法至道間化去

胡元雅虞集青霞觀碑茶陵州人幼學於觀中及爲觀主則雍熙間矣嘗夢有以施川者至可起待之明

日州民白氏夫婦果來施穀潭高廊水口及界橋之田穀潭長石州之地共千餘畝以充觀用州舊有炎帝靈廟在康樂鄉一夕大風雷雨廟壞漂去別有巨木千百隨水積廟傍胡君請於郡守以建靈廟迨其沒後既寔真宗好道家之言夢胡君以鄉里姓名謁見請佐炎帝之祠上覺使有司物色之起其棺惟一履存餘無有也蓋羽化而仙矣得其事詔爲立祠炎帝廟傍皮弁青圭絳服朱履號曰感應真官水旱疾疫之所禱無不應者景定中以靈顯封顯佑真人希白一統志字寶月潭州人作書有晉人風度慶歷中嘗以淳化閣帖模刻於潭之郡齋有古法帖十卷

楚圓府志號慈明出全州清湘李氏楊大年稱爲西河獅子仁宗嘗召對賜住石霜

譚晟府志鍾陵王氏子少出家叅百丈海二十年不契造藥山下言得法道吾嘗問大悲手眼那個是正眼師曰如人夜間背手摸枕子吾曰會也曰作麼生會曰遍身是手眼師曰只道八成示寂茶毘得舍利千餘瘞於石塔謚無住禪師

周福府志居長沙縛竹爲庵讀梵書戒律精嚴一日諭其徒曰吾將火化入山拾柴積數丈許沐浴舉火朗朗誦經火益烈木魚不輟口授諸徒遇大旱呼其名當爲霖以濟後屢禱必應往往於風雨中遙聞木

魚誦經聲

僧虎溪湘潭縣志正德碑記隱山後有巖名龍王山下有寺名慈雲禪寺考慈雲者因歲旱時山有龍女詭異出沒土人禱祀輒雨故嘉其事而表之也宋天聖間有僧虎溪居此靈跡屢著文定自碧泉來與之遊號曰雲石自是咏南泉題珂里往來衡嶽間寺始大著

總印禪師湘潭縣志初師嗣馬祖開山三角寺師示衆曰汝若論此事曉上眉毛早已蹉過了也麻谷曰曉上眉毛卽不問如何是此事師曰蹉過也谷乃掀倒禪床師便打師去其付法不知爲誰闖數傳有邵

武道勅禪師得法於洪州石門乾禪師自臨州景德
來住長沙之角山道望隆著學者歸至如雲弟子爲
建壽塔於白雲衝之陽宣和五年十月禪者某過焉
師導至塔所爲之銘銘曰東林法道盛於石門在元
祐間歸者如雲後三十年三角有聞石門嫡子東林
諸孫道如平地世不舉步陟危隨谷自爲險阻有來
求者弗答弗顧但以此心一酬佛祖白雲之衝叨塔
以成如魚千里時遮之行千巖月色萬壑松聲欣然
而笑誰爲死生

邵琥一統志湘陰人少與兄玘翁珪同遊太學遇主
人後歸都嶠山卓庵修煉元符初蘇軾自嶺表歸訪
琥於庵畱旬餘琥後立草庵於西蜀峩眉山遁去不
知所終

梁野人列仙傳名戴長沙人遊方外兄顏守廬州戴
謁之顏令換衣冠戴曰山林風致惟事內觀何索我
於形骸之外卽出寄旅邸貽守書曰翁野人以爛蘿
久候不果奉辭惟冀珍重仍遺所著敝衣異香襲人
殆非世所嘗聞乘空而升不知所往

道楷禪師府志政和間卓錫芙蓉三詔不起賜紫袈
裟加照國禪師之號不受上怒遣使脅之有可以若
病爲之辭楷曰無病竟受答有司謂之曰何自苦乃
爾楷曰無病而以病求免是欺心也今塔址猶存

鴉葬婆勸善書廖等觀知潭州善化縣有一婆日誦金剛經於市乞食夜則歸宿山阿忽數日不見行乞羣鴉集於上令人往視見懷金剛經傍巖而化羣鴉啣土覆之因稱鴉葬婆

麻田仙女府志女姊妹七人結廬山頂修煉踰年昇去里人名其山曰仙女嶺爲祠祀之

蕭真人府志名法真正和中修真於石佛山得道遊江南歸山下塘忽大鳴有銅鑪花瓶湧出因昇至寺後坐化逾月如生肉身至今無恙順治戊子忽流涕數日馬賊至毀其寺今復修葺如初山有方竹牡丹相傳真人手種移植他處則不生

道寧府志歙溪汪氏子壯爲道士於崇果寺執浴一日誦金剛經忽垂足沸湯中有省祝髮蔣山得法於五祖演大觀中譚帥席震請住開福政和間先定寂期至日跣趺而逝茶毘得五色舍利藏於塔

文郁府志寓茶陵定林寺一日與士人同遊過溪橋忽有省悟呼曰居士我不過也乃作頌曰我有神珠一顆久被諸塵封鎖今朝塵淨光生照破山河萬象智才禪師府志初住嶽麓開堂後遷雲溪以清苦立教紹興戊午八月望集衆付雲溪寺書偈曰戊午中秋之日出家住持事畢臨行自己尙無有甚虛空可覓二十三日再集衆示曰白雲湧地明月登天言訖

蹶然而逝

張僧府志名大椿字繼老湘陰人善盧扁術工書筆力遒勁紹興初召見行在賜住雪峯九十八年示寂今大覺寺碑乃宣和庚子椿書

陳楠府志號翠書博羅人以盤籠籬桶爲生後得太乙刀圭金丹法景霄大雷浪書能救病禱雨遇盜殺之瘞三日復甦遊長沙衝帥節執送邕州獄數夕又回長沙中夜食水銀越宿成白金以丹法授白玉蟾嘉定間入漳水解去有葛縣尉在寧鄉見之

雷菴府志住錫長沙高峯寺後主智度平居運畚塹土質樸無文及登壇樹拂出入百家懸河莫遒尤工吟咏俯視齊已輩或曰其先通城人然其詩有云雪溪舊有家聲在則浙人也登鳴鳳臺詩曰秦檜孫枝猶有綠曹瞞臺榭不經秋其他寄感甚多或亦有所托而然者歟

李道人府志字正春湘潭人平時酣酒饜肉醉則臥溝坎中年三十餘斷腥絕慾爲人補巾幘得米二升卽止拾薪自煮食之年九十跌坐化去鼻流如箸長尺許

元

嵇真人府志元時寓寧鄉嵇嵒山煉丹有爐鼎後飛昇去里人立觀祀之塑真人於中一日被火里人重

建累年不就忽有青衣人曰稍依後立之轉盼不見落成數有靈應

月巖禪師府志姓陳世居湘陰大衆塚元大德間出無作門悟明心見性之妙龍騰尸解至今肉體尙存儼然如生

戴永堅虞集青霞觀碑上清正一萬壽宮中羽士也性剛介有守嘗從師授太乙天章之法其法師以其姓氏白於帝期七日神人自授之以其書爲左驗永堅與師約三日却夢神人朱衣高冠執戟導帝命取其手畫文掌中夢覺手猶痛乃以其文告師師取鑰取書合之如其章自是祈禱水旱滅妖怪怪曾不勞餘力矣如茶陵之祈雨京師之祈雪其事尤著四從天師入覲初授以道德弘妙法師再以改觀爲宮授冲道崇元弘妙法師

易公一統志居影珠山下口執畚修路至今巖上鑿至正壬戌易公修路八字及老織屨易食餘則惠人每負稈於坐旁焚之且織且焚晝夜不輟一日釋烟不散結爲白雲遂乘之去今名其地爲草鞋灣立石屋祀之

彭祖師湖廣通志不知何許人七歲來善化爲人牧牛值歲旱師以杖掘地泉水如湧又禾若蟲蝗乃燃一燈於田中以米篩單之卽止居民日供飯食隨以

雙箸挿地自誓云我成圓正宗師此箸復生果發生
楓樹一株師乃於樹下化去

石飛亭仙女湖廣通志長沙李氏女生而能言自云
麻姑化生宅後有飛來石年十二遊其下拾一桃食
之遂不食人間烟火構亭於石上日坐蒲團年三十
六仙去肉身猶存有商張某過洞庭遭風覆舟忽一
女子駕小艇救之張問從何來曰吾家長沙石飛亭
昨來會湘君適見汝溺故亟援爾張心異之訪至石
飛亭為立廟祀焉

明

逍遙子府志善化人遇異人去家十餘年或在峩眉
或在終南迄無定所忽歸省親顏如童子能致雷雨
點石成金每夜光發頂上如嬰兒狀久之正坐而化
禹峯湖廣通志名智寧鄉賀氏子少攻舉子業及冠
祝髮瀉山為慧山法嗣第一人卓錫新化大梅山從
者甚眾有虎來法堂伏地受戒若有大瀉一燈錄詩
文若干卷

阿諾湖廣通志名文惺湘潭周氏子祝髮清涼寺參
嶽麓彌嵩師初不曉文字一旦豁悟能詩文法語皆
得正詮開發南嶽曉霞峯後繼席嶽麓所著有南嶽
游仙記嶽麓雜咏

僧圓鑑府志成都人有戒行善醫宣宗時用藥有效

勅遊名山至安化之黃梅募李福地創寺成坐靜室
中自問曰和尚是那裏來自答曰是奉勅和尚設以
是稽凡隨呼衆僧取勅拜焚之未幾而化年八十餘
嘗題萍草詩云有苗有葉依流浪無蒂無根水上青
取看常無些子用恩波辜負可憐僧

法乘府志字興化攸縣人少通文字精書法年二十
棄捐故技入五臺參顓和尚在雨花庵門庭蕭寂威
儀玉立著詩一卷年三十而寂

中道和尚府志結廬平山題所居曰挹雲其禪從枯
坐入槁木死灰如是者有年忽聞磬聲如冷水澆背
陡然一驚出語成偈久之撒手歸寂了無留滯

李夢真府志號約山不知何許人詢所自來長笑不
答聞人語朝政輒一一明析亦略不齒及嘉靖時至
湘鄉楊氏館之辟穀不食惟稍飲水楊氏於仙壇嶺
築室夢真每入坐封閉嚴密少則數日多則期年始
一出一日囑主人曰吾今不輕出矣十五年後乃可
啟關相見爲我嚴守之楊氏應諾後仇家訟楊藏盜
邑令破關驗之見其側身臥地若熟睡狀形體如生
遊逸僧府志常題詩於安化石城橋觀音閣壁云手
把青苗插野田低頭便是水中天六根清淨方成稻
退步分明是向前又云粗布縫衣禦雪冬一針一線
要從容如今世路多荆棘休得郎常大樣縫後不知

所終

李廷玠楚風補字寤軒安化人七歲夢黃衣人咒曰汝本逍遙天上客親隨玉帝掌元機只因下閱瓊花會流落人間不得歸晨起告父鑑曰汝當爲仙籍中人及長好學善吟不干仕進所著有寤軒詩集

陳五簋楚風補字逸子攸縣人開之子負性傲物意所不可雖貴必回折少補弟子員慟君親之難遂祝髮號南雲行脚錢宗伯吳宮詹諸公與之結方外交工詩廣致書畫古玩意亦不在是也已受報恩囑行笈一肩瓶鉢外皆儒書意氣慷慨有古俠士風其胸中磊磊落落嬉笑怒罵皆別有故人不能測也年五十卒於西泠湘潭王山長爲之傳

釋大成楚風補字竺菴醴陵人少披剃於南嶽後行脚四方居天目最久及老倦遊移歸南嶽毘盧洞廣濟禪寺著有會聖堂集

釋明照楚風補字元鑑一字別山黃陂阮氏子早值亂離雉髮爲僧性高潔工詩文初住西園於茅坪湘潭諸處登講座後卓錫長沙龍泉寺與襄陽袁奐稱莫逆交著有衡嶽唱和諸詩及機堂詩集

曹宗先府志號野人初爲益陽庠生崇禎末日負重石出人人怪之獻賊至曹負母急走二百里外得免老髡其頂沒後二十年常郡叅幕許尙忠以公事舍

其廬於度上得一稿卽少時受業遊僧所編通源集
詢狀貌宛有稚少鬢許驚異因憶遊僧留別一偈報
筆楚益陽曹氏行尸始知僧爲曹脫化爲刻通源集
行世初曹無鬚偶遇某道人手捫其鬚稱美道許贈
之後道人髭髯盡脫曹生美髯及祝髮並難其髯
溥良府志號合巖吉之禾川人世家於攸幼攻書能
屬文及長以詩見知於祁陽王王奇其才欲以湯休
賈島故事勸之不可後謁顓大師於五臺庵久之辭
歸由是知名後三載顓大師至攸合巖與釋興化師
事焉甲申後謝客閉門年八十五歸寂著合巖詩集
釋五峯府志陝西人風骨秀峙侍天臺密和尚護法

南來冀興瀉事領衆入山二年蘊璞潛輝密心不耀
崇禎癸酉秋余集生中丞迎住白下及圓寂遺命歸
骨於瀉山其徒作塔於南橋之陽有語錄一帙
僧知休府志秦人不食烟火凡閱月偶爲樵者所見
始有物色之者往山多虎患僧與虎馴狎作偈戒之
今其境虎不傷人題詩洞中有曰我到龍回似有因
特來此地覓前身洞中鐘鼓猶無恙不記當年翻貝
人一日坐化塔藏洞口

本朝

楚林禪師府志閉關攸縣之大士庵大兵入攸潰卒
奔者多從西郊取路追兵絡繹如織聞禪師名莫敢

犯十里居民賴以全活各將軍迎之京師受諸供養
斯彌禪師府志號西生攸縣人年未二十專持楞嚴
戒律精嚴通宗教嗣顓愚和尚說法江南紫竹林著
諸經補註行世

願乾禪師府志攸縣人精進行門嗣梅谷和尚法棲

隱山谷淡寂自如著金剛大義語錄

普繪府志字墨隱劍度輞川得法於西江天培禪師

攸縣張令迎居大悲閣其父年九十三故太守也受

學於墨隱大闡宗旨著有輞川集

釋德惺楚詩紀字解斯號航山一號放叟本攸邑文

學姓陳字盧郎中年逃禪著有木石音衡嶽吟等詩

釋智相楚詩紀字最懶號三善本湘鄉楊氏子年十

八棄舉業為浮屠所刻有禪餘別集聽溪吟南詠外

草思親獨悲吟悔遊諸集

衡州府

高陽氏

赤精子道藏顓頊辛卯元年降於衡山教帝解紛舉

竟治國安民滌蕩九黎陽明八愷有龍野紫髯之兒

甌有虵身赤髮之渠魁力拔不周首觸山碎天低西

北致日月之西行地亞東南使江海而東注君追呼

六甲役御百靈訓之以微言之經教之以大順之道

漢

劉根一統志不詳何許人遊觀四方晚歸南嶽之東
峯煉真服氣後仙去

李鳳仙楚風補南嶽人自幼不語人問之乃答云知
白守黑道貴昏默

惠車子南嶽紀畧與嚴君平友善遊湘樓衡尸解赤
帝峯上

賣薑翁一統志不詳何許人日在嶽市賣薑取擔上
薑納口中吐出成金日莫不復見

雙子辨府志號華蓋居在靈芝峯修煉

王谷神府志即太微先生蜀青城山道士渡荆渚之
瀟湘至南嶽十算於金母殿胎息還元數年道成

晉

施存湖廣通志號湖浮先生居衡嶽石室或跨日豹
而出永康元年四月昇舉

魏夫人顏真卿碑記任城人晉司徒劇陽文康公魏
衍之女名華存幼而好道志慕神仙味真耽元年二

十四適南陽劉文生二子長曰璞次日退劉文後為
修武令夫人齋於別寢一日遇羣仙授太上寶文及

黃庭內景經遂得神真之道嗣值天下亂夫人攜二
子渡江璞為庾亮司馬又為溫太真司馬安成太守

退為陶太尉侃從事中郎夫人自洛邑遠江南登衡
山棲紫虛閣望前峯妖氣祛之仰天臺白雲潭其遺

跡也自是真心齋靜真靈累感凡在世八十三年以晉成帝咸和九年白日飛昇位爲南嶽夫人

巖下翁湘中記永和初有採藥衡山者道迷糧盡過

息巖下見一老翁四五年少對執書告之以饑與其

食物如薯蕷指教所去六日至家而不復饑

羅郁楚風補晉簡文帝黃門郎羊欣之祖權好道述

有仙女降其家云我本姓楊九疑山中得道女羅郁

也以過謫人間因贈羊詩並遺手巾條幌等物隱影

化去相傳在湘東山中

新野先生府志晉太康中與徐君採藥入衡山

陳興明府志潁川人訪真跡於南嶽天柱峯遇二真

人授明鏡元真之道修之十八年以太始四年三月

一日昇舉

六朝

宋

徐靈期一統志修道於南嶽歲久遍遊嶽之巖洞及

諸山谷一十五年無不周覽作衡山記能制服虎豹

役使鬼神元徽中白日昇舉

齊

陳惠度府志潁川人初居茅山採靈藥貨之飲酒不

食數年南遊挑兩笈盡金石之類至南嶽選勝煉丹

深夜爲鬼所擾三搗丹爐惠度蟠石上誦黃庭內經

佩五嶽真形圖道力潛伏妖氛盡散丹成光氣滿山
以永明三年五月十三日昇舉

梁

張潤玉楚風補衡山仙女嘗降沈警家贈以歌云洞
簫響兮風生流清夜闌兮管絃適長相思兮衡山曲
心斷絕兮秦隴頭

周靜真府志住持岫嶠峯下武帝師之雲水奔湊講
堂如市因賜名曰曾賢觀

張如珍南嶽志南陽人居南嶽遇神仙授明鏡之道
日照物理者天也照物形者鏡也天之道以清鏡之
體以明人能存天清鏡明澄心淨神則至道成矣虛

其室則白自生定其心則道自生信哉言乎如珍修
道九年而成以天監三年十一月十三日於九仙宮
昇舉

王靈輿湖廣通志初居五老峯夜夢神人謂之曰得
道者當得福地靈墟爾往居朱陵之上峯紫蓋之嶺
岫可以冲天矣遂遷居南嶽中宮以天監十二年七
月昇舉

鄧郁一統志荊州建平人居衡山洞靈臺辟穀三十
餘年惟飲澗水服雲母屑天監十四年乘鶴去

陳

慧思祖燈武津李氏子常登祝融峯飛錫福嚴寺一

日師指巖下曰吾前一生曾此坐禪爲賊斷首
獲枯骨一聚至西南隅指大石曰吾二生亦曾居此拾
髑髏起塋焉又至蒙密處曰此古寺也吾三生嘗托
居此地因指人掘之果有僧用器皿及殿宇基址指
兩石下得遺骸乃建塋今三生塋是也又於東畔嶺
巖傍建臺爲衆講般若法今爲般若寺衆患無水師
以杖擊巖下俄有二虎跑地泉乃涌出今虎跑泉是
也大建元年與道士歐陽正許至金陵封以勅印令
還山稱爲大禪師以大建九年六月示寂

隋

吳涵虛府志字合靈居衡山華蓋峯院中終日沈酒

無烟火之具俗呼爲吳獐好睡經旬不食嘗言若要
閒卽須懶素不攻文忽作上昇歌以清泰二年白日
超舉

唐

張惠明府志貞觀末修真於衡山之北帝院遇石英
夫人傳道行抱一三五混合之法後尸解

徐靈府南嶽志唐元宗時徵士隱居衡嶽注計然子
書十二篇

懷讓一統志姓杜氏金州人先天二年至衡嶽居般
若寺天寶二年示寂諡大慧禪師

司馬承禎一統志字子微開元初自海山乘桴鍊真

南嶽結菴於觀北一里許張九齡屢謁之明皇令其弟承禕招之較正道德經

希遷一統志姓陳氏端州高要人直造曹谿得度未具戒屬祖圓寂稟遺命謁青原天寶初之衡山南嶽寺卓有石狀如臺乃結菴其上時號石頭和尚

本朝雍正十二年封智海無際禪師遣有司致祭

薛季昌一統志河東人遇正一先生司馬承禎於南嶽授以玉洞經錄研真窮妙明皇名入禁掖延問道德談及精微明皇喜之恩寵優異尋卽還山

王旻一統志號太和先生居衡山貌如三十餘長於佛教明皇與貴妃楊氏禮謁拜於牀下訪以道術旻

隨事教之大約以修身儉約慈悲爲本在京累年天寶中請於高密牢山合煉許之

懶殘一統志天寶初居衡嶽寺爲僧衆執役食退卽收所餘性懶而食殘因名懶殘李泌寓衡嘗夜往見之懶殘方撥牛糞火煨芋出半芋食之曰慎勿多言領取十年宰相後果然

慧海一統志方廣寺開山祖師每誦經時有五白衣長者列坐聽聞慧海詢其姓白衣自稱乃此山龍王也願獻寺基慧海諾之一夕擁沙爲平地遂建刹焉道一府志卽馬祖漢川什邡人容貌奇異牛行虎視引舌過鼻足下有二輪文開元中習禪定於衡嶽傳

法院遇讓和尚密授心印學者雲集貞元四年正月
登建昌石門山謂侍者曰吾之朽質當於來日歸茲
地矣以二月一日跣趺入滅賜諡大寂禪師

祝融峯道者府志未知何許人嘗愛飲醜世人戲投
以毒師輒吐地石為之裂體無恙也每經行林壑有
一蛇一虎相隨將入寂謂眾曰吾當畱片骨與汝等
為福田眾昇以茶毘法薪盡火滅果得片骨大如琵琶
與火同色相與捐貲建塔以藏

惟勁府志住南嶽般若寺師雪峯而友元沙深入元
奧一日問鑑上座聞汝註楞嚴二文殊作麼生乃揚
袂去嘗續寶林傳四卷別著南嶽高僧傳

元泰府志南嶽僧沉靜寡言未嘗衣帛時謂之泰布
衲始見德山後謁石霜掌翰二十年與貫休齊已為
友後居蘭若曰金剛臺嘗以衡山冬被山民斬伐燒
畚為害乃作畚山謹達於九重詔禁止之後示滅閣
維收舍利建塔於迎雲亭側其畚山謹云畚山兒無
所知年年斫斷青山岫就中最好衡岳色杉松利斧
摧貞枝靈禽野鶴無因依白雲迴避青烟飛猿猱路
絕巖岸出芝樹失根茅草肥年年斫罷仍再鋸千秋
終是難復初又道今年種不多來年更斫當陽坡國
家壽岳尚如此不知此理如之何

汪子華南嶽志蔡州汝陽人七八歲通經義十三歲

知天文地理之學開元中屢舉不第棄去與顏真卿
同學長生術祿山亂并家南遊愛南嶽之勝結庵祝
融峯下修道九年不出世傳仙去

承遠一統志始學於成都唐公至荊州進學於玉泉
真公授師以法至衡山爲教魁人從而化者萬計第
子法照在代宗時爲國師言其師有異德天子名其
居曰般舟道場德宗朝詔立爲彌陀寺貞元十八年
終於寺柳宗元爲碑刻於寺門

陳法明府志修行岫巘峯晉賢觀以麒麟獻被旨內
召尋乞還山封悟真先生

曇藏一統志住南嶽西園蘭石本受心印於大寂禪
師後謁石頭希遷瑩然明徹貞元二年遁衡嶽之絕
頂人罕參訪尋以脚疾移止西園

譚峭一統志字景升唐國子司業洙之子好黃老諸
子及周穆漢武茅君列仙內傳靡不精究一旦出遊
歷名山後居南嶽煉丹成服之入水不濡入火不灼
著譚子化書

俞靈瓊列仙傳河間人入衡山修道南嶽赤君授以
回風術元和中郴州官吏見其談說異之卽曰我偶
然爾非有所知也尋入九疑山絕粒仙去

雙龔祖湖廣通志常居南嶽求度世之術刻意誦黃
庭玉篇因作黃庭觀

王十八湖廣通志衡山人劉晏好道術耳有十八名及刺史嶺南道過衡山攜十八往嶺中晏歸朝十八出藥三丸與之遂巡起晏再拜挽留不可但日藥一丸可延十歲晏拜相領鹽鐵坐貶忠州已三十年矣一日十八復至以鹽八水令飲晏吐出前藥三丸晏有姪在側攫而吞之十八熟視曰汝有道氣吾固知爲汝所掠也遂去

蕭弓手湖廣通志未陽人役於茶陵領符往鄉督賦宿道稅者家聞問壁鴉作人語云明日主人將烹我餉蕭弓手蕭之作佛作人在我生死間耳蕭異之明日主人將宰鴉蕭索其鴉歸隱山中相與說法久之

與鴉俱飛去

田良逸南嶽志南嶽道士風格清峻山人見者禡塔盡消侍郎呂渭楊憑皆師事之元和初潭州大旱迎良逸祈雨披髮登輿到郡終無言俄而雨降其友蔣含弘居九真觀混元之氣惟遜於田而修持趨向如出一門常深相契含弘善符術自晦其道入莫之知未幾與良逸俱蛻去

龐蘊楚風補字道元襄陽人侍父任衡州遂家焉性嗜浮屠與丹霞禪師爲友初謁石頭後參馬祖於言下頓悟元和中北遊襄漢有女名靈照常鬻竹漉籬以供朝夕蘊嘗云難難難十石油麻樹上攤其妻云

易易易百草頭邊祖師意其女云也不難也不易饑
來吃飯倦來睡又云易復易卽此五蘊有真智十方
世界一乘同無相法身豈有二若捨煩惱入菩提不
知何方有佛地蘊將入滅謂女曰視日早晚及午女
曰已中矣而有蝕也蘊出戶觀女卽登父座合掌坐
亡蘊笑曰我女機鋒捷於吾矣於是更延七日州牧
于公頤問疾蘊謂之曰但願空諸所有慎勿實諸所
無好仕世間皆如影響言訖枕於公膝而化
住括湖廣通志長慶初至衡山居月餘忽謂衆曰汝
願聞有徐敬業乎我是也兵敗入大孤山修道今來
此吾已證四果矣預知卒期葬於衡山

劉元靖南嶽志武昌人初師王道宗道宗仙去元靖
感悟遂遊名山入南嶽峻峯鑿石穴以居絕粒煉氣
唐敬宗召入思政殿問長生術尋放歸武宗復召入
禁中受法錄賜號廣成宣宗時仙去惟杖履在
軒轅集南嶽志年過數百顏色不衰宣宗召入內庭
問長生之道集曰撒聲色去滋味哀樂如一德刑無
偏自然與天地合德日月齊明長生之術在是矣辭
歸山至江陵於一布囊中探金錢以施貧者約數十
萬中使從之忽亡其所在

華幽棲南嶽志遊西蜀二十四年歷荆渚游瀟湘修
真五峯下於石臺上注靈寶經臺上烟雲如香篆因

名天香臺後尸解

軒轅彌明韓愈石鼎聯詩序元和七年十二月四日衡山道士軒轅彌明自衡山來舊與劉師服進士衡湘中相識將過太白知師服在京夜抵其居宿有校書郎侯喜新有能詩聲夜與劉說詩彌明在其側貌極醜白髮黑面長頸而高結喉中又作楚語喜視之若無人彌明忽軒衣張眉指爐中石鼎謂喜曰子云能詩盍與我賦此乎劉往見衡湘間人云年九十餘矣解捕逐鬼物拘囚蛟螭虎豹不知其實能否也見其老頗敬之不知其有文也聞此說大喜卽援筆題其首二句次傳於喜喜踴躍卽綴其下云云道士啞

然笑曰子詩如是而已乎卽袖手竦肩倚北墻坐謂劉曰吾不解世俗書子爲我書囚高吟曰龍頭縮菌蠢豕腹脹彭亨初不似經意詩旨有似譏二子相顧慚駭欲以多窮之卽又爲而傳之喜喜思益苦務以壓道士竟亦不能奇也畢卽傳道士道士高踞大唱如初而語益奇皆侵劉侯劉與侯已賦十餘韻彌明應之如響皆頽脫含譏諷夜盡三更二子思竭不能續因起謝曰尊師非世人也某伏矣願爲弟子不敢更論詩道士奮曰不然章不可以不成也卽又唱出四十字爲八句書訖使讀讀畢謂二子曰章不已就乎二子齊應曰就矣復請問所解何書道士不答依

墻睡鼻息如雷及覺日已上驚顧覓道士不見
惠日盧藏用贈衡嶽十八高僧序有沙門惠日俗姓
慶氏濮陽人也息心達道利見觀方自北徂南爰憇
茲土如空寂舍覺今昔常然道清涼地知我人非遠
備聞衆異祇覲前修而山間朴畧簡編無次遂覃思
翰墨博采遺風事無虛美務存據實自思大師州一
十八人著之於傳

白椿夫一統志字永年僖宗時人居南嶽能役鬼神
祛妖怪又能爲人已病人尊信之

釋道初楚風補爲五祖侍者有年住龍華寺機辨峻
捷門人罔知造詣一日對衆偶吟其詞云昨日離城
市白雲空往還松風清兩耳端的勝人間

張白膠楚風補辟穀衡山雲隱峯日飲深醉不知何
處得酒後不知所終偶歌云山花頭上插酒向口中
斟醉眼看醒漢茫茫盡喪真

審承府志南嶽福嚴寺僧相國李公上山問如何是三
祖師西來意師指庭前柏樹公如是三問師如是三
答公欣然頌曰出沒雲閑滿太虛元來真相一塵無
重重請問西來意唯指庭前柏一株

聶師道南嶽志歙人也裴樞治歙州當唐祚之季詔
令不通池州陶雅宣州田頌舉兵圍歙歙食盡援絕
議以城降而城中殺外軍已多無敢將命出者師道

自請行乃縋出城二將與之語大悅城中人獲全嘗
遊南嶽訪洞靈宮之勝已而還廣陵未幾尸解
何尊師一統志不知何許人居衡嶽人問其氏族年
壽但曰何何問其鄉里亦曰何何人因號曰何尊師
頗喜繪事

宋

率子廉蘇軾率子廉傳率子廉衡山農夫也愚朴不
遜衆謂之率牛晚隸南嶽觀爲道士觀西南七里有
紫虛閣卽魏夫人壇也道士以荒寂不肯居者惟子
廉樂之端然而已莫見其所爲然頗嗜酒往往醉臥
山林間雖有風雨至不知虎狼過其前亦莫害也故

禮部侍郎王公祐出守長沙奉詔禱南嶽訪魏夫人
壇子廉方醉不能起直視公曰村道士愛酒不能常
得得輒徑醉官人恕之公察其異載與俱歸居月餘
落寞無所言復送還山曰尊師韜光內映老夫所不
測也當以詩奉贈旣而忘之一日晝寢夢子廉來索
詩乃作二絕句書版置閣上衆道士驚曰率牛何以
得此太平興國五年六月十七日忽使謂觀中入曰
吾將有所適閣不可無人當速遣繼我者衆道士自
得王公詩稍異之矣及是驚曰天暑如此率牛安往
狼狽往視則死矣衆始大異之曰率牛乃知死日耶
葬之嶽下未幾有南臺寺僧守澄自京師還見于廉

南薰門外神氣清逸守澄問何故出山笑曰閒遊耳
寄書與山中人澄歸乃知其死驗其書則死日也發
其冢杖履而已

佛慧司馬光趙清獻公傳佛慧居衡之南禪公日親
之慧未嘗容措一詞後典青州政事之餘多晏坐忽
大雷震驚卽契悟作偈曰默坐公堂虛隱几心源不
動湛如水一聲霹靂頂門開喚起從前自家底慧聞
笑曰趙閱道撞彩耳及清獻卒慧悼以偈曰仕也爲
邦瑞歸與世作程人間金粟去天上玉樓成慧劍無
纖缺冰壺徹底清春風激水路孤月照雲明

唐道人耒陽縣志嘉祐間奉仰山祠香火一日遇異

人爲補泄漏甌於是頓悟後晝頓化去邑人卽祠爲
迎仙道院天祐六年有石記之

無械仙翁耒陽縣志隱居直釣巖道行高妙陳紹夔
直釣巖詩山容水態任淹留遙望仙槎幾度秋亭傍
石窩高礙日樹依風穴巧當樓丹邱竈冷烟霞古猴
嶺梯危猿鶴愁不遇忘機江上客黃冠何處覓沙鷗
了信南嶽紀畧高臺寺住持僧有詩名張南軒遊嶽
讀其集題曰蕭然僧榻碧雲端細讀君詩夜未闌門
外蒼松霜雪裏比君佳處讓高寒南軒唱酬詩序亦
著其名

王真人南嶽志修真九仙觀距嶽廟十里梁天監中

建宋景祐中故觀文殿學士孫沔謫知永州夢道士
以田爲託後徙潭州因祀嶽至九仙觀見王真人像
與向所夢道士適肖遂檄縣勾稽其觀田果爲鄰觀
侵占乃釐而歸之 國初羽士李皓白重修觀前有
石方廣數丈鑄九仙飛昇之壇六入字尙宋時遺蹟
也按王真人名靈輿

懷志府志師預講席十餘年嘗欲會通諸宗異義有
禪者問曰杜順賢首宗祖師也而談法身側曰懷州
牛吃禾益州馬腹脹此偈合歸天台何義師不能對
卽遊方至洞山謁真淨問古人一喝不作一喝用意
旨如何淨叱之師趨出淨笑呼曰浙子齋後遊山好

師忽領悟久之辭去菴居於衡嶽石頭二十年不與
世接有偈曰萬機休罷付痴憨踪跡時容野鹿叅不
脫麻衣拳作枕幾生夢在綠蘿庵崇寧元年在見龍
安照禪師居於龍安最樂堂明年六月晦問侍者日
早暮日已夕笑曰我睡已覺遂寂

智明傳燈錄衡州花藥僧依寶峯有年無省因爲衆
持鉢峯自題其像曰雨洗淡紅桃萼嫩風搖淺碧柳
絲輕白雲影裏怪石露流水光中古木清噫你是何
人師持至焦山枯木成禪師見之歎曰今日方知此
老親見先師來師遂請其益贊成曰豈不見法眼拈
夾山境話猿抱子歸青嶂後鳥啣花落碧巖前師遂

悟

花光說郛花光本蜀僧嘗寫梅作暗香疎影溪雪春風四圖黃山谷觀之曰如嫩寒曉春行孤山水邊籬落間但欠香耳靖康間師徙江南柯亭與陳簡齋並舍而居簡齋有詩贈之一統志花光寺有僧花光居此善畫梅因以名寺

悟禪師一統志師居衡陽花光寺嘗養白鷄每誦經則登膝而聽後鷄死埋於寺側生白蓮花花謝泉涌因號白鷄泉

大慧杲指月錄徑山大慧杲禪祖侍郎張九成嘗曰某每聞徑山老人所舉因緣如千門萬戶不消一踢

而開或與聯輿接席登高山之上或緩步徐行入深水之中非出常情之流莫知吾二人落處某此辨香不敢辜負他也紹興辛酉師毀衣牒屏居衡陽凡十年

守端指月錄舒州白雲守端禪師衡州葛氏子幼事翰墨後依茶陵郁師披剃往參楊岐大悟遊廬山圓通訥以院事讓師示衆若端的得一回汗出來也向一莖草上便現瓊樓玉殿若未得端的一回汗出縱有玉殿瓊樓卻被一莖草蓋卻且道作麼生汗出良久云自有一雙窮相手不曾容易舞三臺

明

廖孔說列朝詩傳字傳生衡州人從父宦陪京遂爲
應天諸生博學強記爲詩不經意輕雋自喜漉囊策
蹇日游谿山間山僧道流無不相識問以京洛貴人
都不記也每入城過酒人及好事家酣飲賦詩不數
日輒厭去居山中不數日又復來以此爲常海昌許
同生棄官隱華陽招孔說偕隱常往依焉晚年成酒
持律臨終持佛號而絕後人或見之於茅山柏枝左
右以爲尸解云

德昌府志俗姓盧安仁浦陽人初受業於惠日寺戒
行清潔超悟禪法緇流宗之嘗開建宜陽金山寺築
小室閉關誦經不問外事年七十復歸本寺不火食

者數月忽一日召其徒授以法旨卽示滅

明宗府志雲遊僧成化間至耒陽縣沿門乞薪油人
問之答曰吾受戒吾師逢衡則住遇耒則止此地吾
將終焉已而積薪油於南門外披袈裟與衆拜別遂
登其上舉火以焚火已及身猶拱手謝衆須臾而化
無礙南嶽紀略南臺寺僧弘治初從信陽來披一衲
百結如粟穗坐天柱峯下獅子巖口啖苦菜不穀食
者二十年堅苦動衆爲建寺居之李承箕遊嶽記其
狀

望山衡陽縣志字慧修余守觀第也幼不如葷多疾
病送花藥寺爲僧長雲遊遇樵問道在那里樵指樹

上師拔樹頓悟云攀援已盡四大皆空遂隱天臺正德時觀於東岸構庵龍泉置田一千畝迎住緇流一日遽云某甲示寂偈曰有底有益甚是自在不借他口自封輕快

開緣府志號無盡順天人嘉靖間與僧寶珠同遊南嶽初棲明月峯已又得花藥僧元章山莊於永泰峯之麓收歲入以待方來龍象遂居永泰峯四十餘年草衣木食悟佛心印年七十坐化

真文府志號知休華亭人幼業儒遇異人授以黃庭之術遂棄儒慕道內觀調息者十餘年後入都聽秀師說法悟曰空王之道大矣遂祝髮爲僧與圓昂結

侶少陵叅學大章小章悟佛宗旨隆慶丁卯遊南嶽結茅淨瓶巖而圓昂居小松山往復叅証並稱辨才後化去

圓昂府志號遜安衡陽人祝髮於花藥寺已乃叅南嶽無盡和尚遂嚴戒律習教明宗知佛心印比歸衡而花藥舊侶皆禮之爲師在南嶽建雲龍寺又建華藏閣於花藥寺置常住田以贍僧徒後遊金陵涉南海謁觀音大士歸從之說法者千五百人以萬歷壬辰人寂於白下淨業庵歸葬於南嶽小松山陵龍德孚銘其塔曰南嶽胡來西天胡去丕振宗風洪濟法雨五葉有傳一葦可渡無生無滅何去何住最哉

後人永修禪士

達觀府志萬歷間奉勅至南嶽因隱焉有詩鑄廟石
六修廟還栽廟裡松廟修雲外鶴巢空何如依舊不
修廟畱得長松老化龍

憨山德清府志萬歷間國師被譴戍廣東電白已而
赦還寓衡之湖東寺隨處說法題詠甚多副使吳宗
偉贊曰亭亭孤松澄澄水月中有一人出廣長舌日

夜波濤不在聲正是吾師不說說後於廬山示寂

李總徹衡陽縣志衡陽陳婆子住姑蘇慧登禪院晚
歸南嶽淨瓶巖嘗上堂示衆云臥雲深處不朝天剖
一微塵出大千獅子吼斷黃金索象王耕破劫初田

當機會得真消息火內重開五葉蓮要與秋風戰一
場等閒直入空王殿空王殿誰家竈神無烟焰

文羽運衡山縣志字叅儀少好元籙於二十人中者
若干年天啓甲子宜貢矣忽棄去之時大守李藩司
劉亦好元而有得者與論叅同契甚合相結而去後
邑人有李姓者見之京師

無學大師府志徽州人俗姓王早歲補弟子員爲學
使熊廷弼所技棄家披剃歷叅諸方隨一瓢入南嶽
從學者聞風雲集因西遊至荆紫峯縛茅以居署其
庵曰單丁山陰祁中丞迎任能仁桂王請演法衡州
皆堅拒不赴後南入九疑劉侍御與秀爲築室處之

閉門謝諸方而學者復麇至湘人士苦逆出山師示
偈云世亂難出山病多懶開口閉坐深澗中高拱兩
隻手

李皓白李燦李鍊師瑣碎錄序予方外友皓白篤志
真修年垂耳順躬行實踐於經世出世之務一一從
艱貞淵塞中錘鍊而出每山栖孤寄與予上下古今
往復論析天下人情物理氣運消長寒暑代謝間及
星宮數術昆虫草木之微罔不溯幽探蹟期於實落
根剝而後止顧未嘗竊竊以撰著爲事乃獨取平日
目所偶及剩冊殘書單詞隻語或痛癢偶觸於其身
或勸戒可昭於來許或訐謨雅論可襄王化或清機

妙緒符契道真隨處錄之久乃成帙自名之曰瑣碎
錄噫是誠瑣碎也歟哉入元圃者所見皆夜光明月
遊蘂珠者所遇皆火齊木難苟得乎是而珍之可以
復性可以立命可以用世可以出世尼山祗園與夫
在史家合爲一書非語言文字比也

鄺幼父南嶽志幼父修真朱明峯一日騎牛遊羅浮
訪蘇仙入朱明洞曰此南嶽前洞也復有鄺秋蟾宦
成歸隱得秘書於石匣未幾脫化去

海龍耒陽縣志名上玉年二十喪父母妻亦死孑居
齋公嶺業園自供持齋念佛居四年有虎繞其室逾
月不去一日過楓木嶺遇老者授之以桃時天啟甲

子七夕玉會衆曰予應以是月十五去去當火死越
日積薪爲壇舉手作咒擊木魚念彌陀火至腹乃拱
手與衆曰去也去也丙戌大旱玉假夢於弟令設供
於壇衆至壇燃燭時方赤日雲起彌漫已而大雨衆
遂設像於永鎮庵曰海龍禪師至今猶有人遇之求
雨仍驗

許演空南嶽紀略沛縣人由武當遊南嶽訪九仙觀
遺跡結茅居焉桂藩聞其苦行延至郡貴族爭建江
樓迎之許曰美矣不免一堆灰後江樓火人始異之
所著有道德經註行於世

九龍盆火頭府志河南人不詳其姓名崇禎戊辰入
九龍執事火頭遇濕柴輒焚香禮拜火卽起火中往
往吐青蓮花狀二十年不言語忽一日執帚掃佛塵
向盃馱作語云來世當再來此地修行因擊鼓聚衆
曰三日後當長往矣至期趺坐而逝

行勇府志字不退浙之嘉興人早歲爲農家子方叱
牛頃犁耨斷忽有悟遂薙髮出家徧參諸方見玉林
禪師言下契合遽授法時四方禪宗雲集爲玉林法
嗣者尤傾動天下勇獨芒躋布衣隱南嶽蓮花峯

本朝

淨訥湖廣通志號且拙安仁王氏子初叅巾紫峯無
學次叅弁山瑞白於百丈瑞印以法偈卓錫常寧大

義山刻有法華楞嚴方等諸經註原宗辨謬
德遠府志眉山人初叅西山源尋歷諸方後嗣法於
萬峯韜順治戊戌住持衡陽之駒峯慈門禪院禪機
電發人咸嚮慕有語錄若干傳於世

長菴湖廣通志字異日南昌人靈隱和尚法孫巡撫
周名南請居上封寺高潔變幻工於詞翰侍郎王澤
弘給事車萬育暨諸名流與之酬唱所註有語錄上
封寺志詩文

智音府志號不韻漢陽人西山遠谷淨源入室高足
也尋遊慈化寺寺爲會庵道場曾手植牡丹一株
枯落積歲時寺僧夢會庵凝坐塔院中及曉音至如

夢中像衆遂留音說法明日牡丹枯枝忽放人以爲
曾菴後身也繼歸西山柏子堂禪道大行著有鈍斧
家寶及五好歌爲四方傳誦康熙間退隱桃花門人
爲建塔於南嶽之白楊坪焉

智麓府志崑崙山人初叅義山且老繼得法於弁山
住持衡陽之旃壇林邑人王夫之贈以詩曰我聞崑
崙山乃在西南維其上有瑤圃世人莫能窺山足歆
洪流萬里飛漣漪千古無問津水山徒崑嶽惟有西
來胡碧眼而髯鬚彈指卽凌渡雷聲破冰澌亦只許
一度桃花無再時平地起骨堆消散欲何爲師今卽
此住離此亦非離鼻上卽有眼眼上文有眉境閒與

境開東風吹柳絲是爲崑崙足遊去莫狐疑

天培禪師南嶽志吉州人姓劉名常鑑嘗聞爆竹聲

得句云頂門火發響如雷大地山河立下階始信從

前空費力一重撥盡一重灰誦經苦行脇不沾席者

十年康熙庚寅主席祝聖寺梵行清白塔建天柱峯

下

無心道人袁奐南天門無心道人傳道士號無心初

不詳其名氏余壬寅秋八月登祝融取道南天門下

見道士趺坐石塢草室中修軀疎遠癯黃其面予至

與之揖澹靜淵閒有翩然雲霞氣周視其室予無徒

侶壁間挂一椶拂子衲衣百結而綻如故一釜塵封

寸許薪水而外無所有蕭如索如不知其何以生活

問道士何姓曰姓劉何號曰無心何方人曰均州予

喜而前曰固吾同郡人也識吾否道士曰出世多年

故不識君予問道士住此修道乎道士曰本不知道

無道可修又問爾住此萬山巔風雨晦冥得無懼乎

曰無懼也木客山精魍魎夜魅皆堪徒侶何懼之有

予又自吾來此作弟子可乎道士曰君世味方深斯

言何欺我哉又問吾茲行欲以望日日可得觀乎道

士遂不應是夜宿上封寺果大雨昧爽霧氣瀾山予

以此念道士必有異輿返南天門復止其廬出香錢

若干貽道士道士曰可置磬下遂以茶遍餉從者餉

畢閉目趺坐一無所言予竦立亦無復有所問惟歎息升輿而去迄下山問之於吳子泰升泰升曰此道士初不知何許人以庚寅辛卯間至南天門依羽人胡某爲師又數年胡去而道士獨處距今十四載日夜坐一小木榻閉目跏趺行吐納運氣之術冬不爐夏不扇戶不扃鑰糧不隔宿有則餐無則饑餓連宵不乞不募山僧有憐之者持升米相貽道士煮爲飯亦不自食呼行路者共餐之餐畢饑餓如故日或樵採往輒敞其扉人過之者亦不敢有所取嘗數月無鹽豉朝夕啜水亦無饑餓色經年不下山偶信步惟至黃庭觀亦不踏村市上山中有一僧健訟播虐氣張甚然見道士輒折節下拜道士徐語曰出家子不濟衆則已播虐何爲者僧對曰氣故耳道士曰氣何常之有挑之則怒息之則平君姑息之可矣僧慚慙無語而退此泰升之告予者如此

破門黃中道破門詩跋破門僧居衡山二十年以詩自娛更工草聖祝融紫蓋之精靈與蒲團墨瀋打成一片久不出山以夙昔相知念予輩遠宦嶺外炎荒寥落芒鞋策杖渡瀟湘下灘水而來時共談咏

曉堂禪師南嶽志姓揚名哲天培嗣也繼席祝聖聿振宗風嘗感猿入定鵝聽經前中丞王公贈詩有猿知入定無驚物鵝慣聽經亦解人之句紀實也

僧耳南嶽志僧耳住石頭庵康熙五十二年五月衡山水漲寺院坍塌無算比水至庵僧方危坐誦經忽霹靂一聲水他徙

道親未陽縣志名智依蔣氏子因觀劇感而爲僧置茅庵不設榻坐悟三載始至黃沙寺趺坐石巖積雪數尺辟穀三月定南王禮迎供養順治六年至未陽坪關佛場顏曰雲山諸僧呼爲活菩薩法律戒行皈依者日衆康熙甲寅冬圓寂呼衆說偈建塔天龍巖曰十年後看吾何如庚午七月衆開塔鬚眉不改形容儼然

天奎未陽縣志邑賀氏子名德松幼入空門洞徹本性涅槃說偈曰擊碎崑岡渾是玉踢翻滄海總成珠後禮五臺入都卓錫慈雲寺

